

## BEADIENTSCHAS

Tier tut ils buns giavischs che nus retschevein all'entschatta digl onn niev lein nus metter vitier entginas BEADIENTSCHAS che valan per igl entir onn.

Beai quels che pon rir sur da sesez;  
els vegnan adina ad anflar detgavunda divertiment.

Beai quels che san differenziar denter in cuolm ed in mun talpa;  
Els vegnan a spargnar ina massa dagrettas.


Beai quels che sa quescher e tedlar tier;  
els vegnan cheutras ad emprender bia niev.

Beai quels ch'ei attents per ils segns dils auters;  
els vegnan a plantar bia legria.

Beai quel che pon surrir e buca far tschera brutta:  
lur vias vegnan ad esser fetg suleglivas.

Beai quels che vesan e carezan il Segner;  
els vegnan a derasar glisch, buontad e legria.

Text ord l'Antenna



A vos tuts, cars parochians, che sestenteis per il beinesser dalla cuminonza en pleiv e vischinadi giavischein nus in  
**beau e grazius onn dil Segner 2009.**

En legria ed engraziament mirein nus anavos sin igl onn 2008 cun sias activitads e tut igl engaschi da parochians cun gidonters e gidontras. Igl Advent 2008 ha survegniu tempra cun las devoziuns oravontut entras la collaboraziun dils scolarets e lur mussadras. Grond engraziament ad ellas sco als geniturs e tuts accumpignaders dils affons. Renconuschientscha dein nus era alla suprastonza dil Museum ed alla Pro Laax per las presentaziuns dallas stallas, il punch suenter l'emprema devoziun e las contribuziuns per ils affons cun il raquent da historias da Nadal. Emblidar vulein nus buc in bi giug da Nadal dils scolars dalla scola primara. Per tut il veseivel e nunveseivel: **Dieus remunereschi tut.**

### Aschunta al plan liturgic dil schaner:

Ell'jamna dils 18 tochen ils 25 da schaner uran ils cristians per l'unitad denter las confessiuns cristianas. Quell'jamna d'oraziun ei ida pli u meins en emblidanza. Nus lein prender la caschun tenor indicaziuns el plan da liturgia da rugar cun Cristus che ura per l'unitad tenor igl evangeli da s. Gion:  
**„Jeu roghel buca mo per els (ils apostels), mobein era per quels che creien en mei entras lur plaid. Tuts duein esser units. Sco ti, Bab, eis en mei e jeu en tei, aschia duein era els esser units en nus, per ch'il mund creigi che ti has tarmess mei.“**

(Gion 17, 20-21)

### Preavis per igl onn 2009

Nos scolars dalla 5avla e 6avla classa retscheivan il sogn sacrament dalla Creisma.

**Dumengia, ils 7 da zercladur entras il vicari episcopal dil grischun Sur Andreas Rellstab.**

Il survetsch divin ei a Laax allas 10.15h ed a Falera 14.30h.

## Informaziuns per Laax

Communiun dils malsauns: Mesjamna, ils 14-01-09 **suentermiezdi**

### Engraziament:

Tier la davosa radunonza generala dalla Missione catolica italiana ei in contract dalla pleiv da Laax cun Don Francesco Migliorati, Domat, ius alla fin.

Don Francesco ha mintgamai celebrau la secunda jamna el meins la sonda sera allas 19.00h la s. messa. Entgins onns ha el fatg quei survetsch per la pleiv ed oravontut per ils parochians dil lungatg talian. La pleiv da Laax ha lu remunerau quei survetsch cun ina contribuziun alla missiun taliana.

A Don Francesco engraziein nus per sia moda spontana e nuncomplicada da sentupar cun il concarstgaun e cun Diu. Nus giavischein ad el vinavon legria e satisfacziun en sia missiun.

### BEINVEGNI als RETGS

**Mardis, ils 6 e mesjamna, ils 7 da schaner visetan ils Retgs las famiglias.** Las famiglias che giavischan la viseta dils Retgs ein supplicadas da metter vid igl **esch casa** in scret. **BEINVEGNI ALS RETGS.** Aschia san ils Retgs nua ch'els san entrar.

### Mardis ein las suandontas parts dil vitg sil plan:

1. Gruppa: Streglia, Via Falera, Davos Baselgia, Pattadiras.
2. Gruppa: Crest, Via Principala, Radiras, Curtgin la Streia.
3. Gruppa: Spenda, Grava.

### Mesjamna visetan ils Retgs :

1. Gruppa: Larisch, Selva, Val, Tului Sut, Strada.
2. Gruppa: Pardanal, Marcau, Cons, Darschalè.
3. Gruppa: Fau, Murschetg, Uletsch.



### Dumengia, ils 11 da schaner embelleschan ils Retgs il survetsch divin allas 10.15h.

Ils recav vegn repartgius all'instituziun MISSIO en favur dils affons ella Columbia ed a Clotilda Demunt, Peru. Dieus paghi allas scolastas ch'accumpognan las gruppas, als scolars ed allas scolaras ed a VUS per mintga contribuziun.

## Informaziuns per Falera

Communiun dils malsauns: Venderdis, 02-01-09 **suentermiezdi**  
Gievgia, 15-01-09 **suentermiezdi**

### Fiasta dil Batten:

Dumengia, ils 18 da schaner retscheiva **Siam Marley Sriarsa**, fegli da Nadia e Prawil Sriarsa-Lombriser ils sogn sacrament dil Batten. Nus gratulein alla famiglia e giavischein a Siam Marley sustegn dalla cuminonza cristiana.



### Viseta dils Retgs en nossa pleiv e vischnaunca:

**Gliendisdis, ils 5 da schaner visetan els il vitg anen.**

**Mardis, ils 6 da schaner vegnan els el vitg ano.**

Nus engrazien al scolast ed alla gruppa dalla sisavla classa per quella solidaritad e l'annunziaziun da Cristus il Retg era da nies temps. Il recav ei previus per sustegn social. Dieus paghi per Vossa generusadad.

**Duront las 4 jamnas d'Advent havein nus saviu observar differentas presentaziuns dils texts liturgics dil temps d'Advent en nossa baselgia:**

1. La dunna che spetga avon la porta aviarta.
2. Il profet che mira egl avegnir ed il pastur cun sias nuorsas.
3. La persona da s. Gion Battista che cloma el desiart: Preparei la via al Segner. Selegrei! El vegn!
4. Igl aungel Gabriel ch'annunzia la nuvia da Maria.

Nus astgein selegrar sin la presentaziun da Nadal. In grond Dieus paghi ad Agnes Cathomen e Maria Chistell dil Cussegl pastoral che han presentau il tema dall'jamna fetg dign e discret. Nus selegrein sin il misteri da Nadal.

**A tuts parochians che han embelliu en differents survetschs nies temps avon Nadal e tier las fiastas schein nus in ferm Dieus paghi per il veseivel e nunveseivel.**